

Broj: 03-03-1. Tematska. Elek. sjed- 297/21
Datum: 26. 03. 2021. god.

Na osnovu člana 104. stava (2) alineje f) Statuta Univerziteta u Sarajevu, Vijeće Fakulteta islamskih nauka Univerziteta u Sarajevu je na 1. Tematskoj elektronskoj sjednici održanoj 26.03.2021. godine usvojilo:

ODLUKU O POSTUPKU, UVJETIMA I KRITERIJIMA ZA ANGAŽMAN DEMONSTRATORA

Član 1.
(Predmet Odluke)

Ovom Odlukom uređuju se kriteriji za angažman demonstratora u nastavnom procesu na Fakultetu islamskih nauka Univerziteta u Sarajevu (dalje: Fakultet).

Član 2.
(Pravni osnov)

Pravni osnov za angažman demonstratora u nastavnom procesu na Fakultetu sadržan je u članu 184. Statuta Univerziteta u Sarajevu (br. 01-1093-3-1/18 od 28. 11. 2018.) koji propisuje svrhu i način imenovanja demonstratora, kriterije za demonstratora i dodjeljuje ovlaštenje organizacionim jedinicama Univerziteta da odrede visinu naknade za njihov angažman.

Član 3.
(Uvjeti za angažman)

(1) Demonstrator se angažuje na katedri u slijedećim slučajevima:

- a) na katedri nije uposlen asistent;
- b) asistent uposlen na katedri ima više sati u određenom semestru/studijskoj godini nego što je predviđeno normom sati, u skladu sa Standardima i normativima za obavljanje djelatnosti visokog obrazovanja na području Kantona Sarajevo, odn. Kolektivnim ugovorom za djelatnost visokog obrazovanja i nauka na Univerzitetu u Sarajevu;
- c) u semestru/studijskoj godini u kojoj se planira odsustvo asistenta na katedri zbog studijskog boravka, učešća u programima mobilnosti akademskog osoblja, stručnog usavršavanja, izrade doktorske disertacije, porodiljskog odsustva i dr, kao i u semestru/studijskoj godini prije planiranog odsustva asistenta radi uvođenja u poslove demonstratora.

(2) Na katedri se mogu angažirati do tri demonstratora u toku jednog semestra/studijske godine, pri čemu će se njihov angažman ugovorom vezati za pojedine nastavne predmete.

Član 4.
(Postupak imenovanja)

- (1) Na inicijativu predmetnog nastavnika, katedra inicira imenovanje demonstratora dekanu i prodekanu za nastavu i obavlja razgovore sa potencijalnim kandidatima iz reda studenata.
- (2) Radi utvrđivanja ispunjenosti kriterija za demonstratora iz člana 5. ove Odluke, ostvaruje se uvid u uspjeh potencijalnih kandidata na osnovu ispisa ocjena koji dostavlja Studentska služba.
- (3) Katedra dostavlja dekanu i prodekanu za nastavu prijedlog o imenovanju demonstratora koji obavezno mora biti praćen:
 - a) ispisom ocjena kojima se potvrđuje da student ispunjava kriterije za demonstratora;
 - b) obrazloženjem ispunjenosti uvjeta za angažman demonstratora iz člana 3. ove Odluke.
- (4) Prodekan za nastavu utvrđuje postojanje nastavne potrebe za angažmanom demonstratora.
- (5) Dekan imenuje demonstratora na prijedlog katedre ukoliko su ispunjeni uvjeti i kriteriji za imenovanje demonstratora iz članova 3. i 5. ove Odluke i pod uvjetom utvrđene nastavne potrebe iz stava (4) ovog člana.

Član 5.
(Kriteriji za demonstratora)

- (1) Za demonstratora može biti imenovan student koji je u prethodnim godinama studija ostvario najmanju prosječnu ocjenu 8, a iz predmeta katedre na kojoj se angažira imao najmanju prosječnu ocjenu 9, shodno članu 184. Statuta Univerziteta.
- (2) Prednost u angažiranju na poslovima demonstratora daje se studentima II ciklusa studija i IV godine I ciklusa studija koji ispunjavaju kriterije iz stava (1) ovog člana.
- (3) U izvođenju vježbi na I i II ciklusu studija mogu učestvovati svršenci II ciklusa studija i studenti doktorskog studija, koji su prethodno završili I i II ciklus studija iz islamskih nauka, i ispunjavaju kriterije iz stava (1) ovog člana. Njihov angažman ne može biti veći od polovine norme asistenta.

Član 6.
(Poslovi demonstratora)

- (1) Demonstrator pomaže predmetnom nastavniku u:
 - a) organizaciji i realizaciji vježbi;
 - b) tehničkoj organizaciji i realizaciji ispita;
 - c) administraciji predmeta (npr. vođenje različitih evidencija i sl.);
 - d) konsultacijama sa studentima.
- (2) Predmetni nastavnik vrši nadzor nad realizacijom vježbi od strane demonstratora i potpisuje ih.

Član 7.
(Obaveze i prava)

- (1) Obaveze i prava demonstratora regulišu se ugovorom između Fakulteta i demonstratora.
- (2) Demonstrator ima obavezu da izvršava poslove iz člana 6. ove Odluke, odn. zaključenog ugovora o angažmanu.
- (3) Za svoj angažman demonstrator ima pravo na mjesečnu naknadu čija visina se određuje posebnom odlukom koju donosi Upravni odbor Fakulteta.
- (4) Ugovor iz stava (1) ovog člana obavezno uključuje klauzulu kojom se naznačava da angažman na poslovima demonstratora ne povlači obavezu Fakulteta u pogledu budućeg zapošljavanja demonstratora.

Član 8.
(Odustvo obaveze zapošljavanja)

S obzirom da se prioritet u zapošljavanju asistenata na Fakultetu utvrđuje na osnovu nastavne potrebe i raspoloživog nastavnog osoblja, angažman demonstratora na nekoj katedri ne implicira bilo kakvu obavezu Fakulteta u pogledu njegovog budućeg zapošljavanja.

Član 9.
(Stupanje na snagu)

Ova Odluka stupa na snagu danom njenog usvajanja.

Dekan

Prof. dr. Zuhdija Hasanović



Dostavljeno:

- 1x Upravni odbor Fakulteta
- 1x Uz Zapisnik
- 1x Ogl. Pl./web
- 1x a/a